

Kutunga Luzingu ya Mbote na Malongi ya Bible
Baleso zole
Kudipesa na Kisalu, Bumolo Ve

Sambu na Baleso yonso 2 --

Kudipesa na Kisalu--Disongidila:

Kusala ngolo na ntima na nge yonso konso ntangu sambu na kulungisa bisalu ya Nzambi me pesa nge.

Contraire ya Kudipesa na Kisalu—Bumolo.

Bankunga sambu na baleso yonso zole:

Sala ngoooo-lo! Kusala ngolo ke mbote!
Sala ngoooo-lo! Kubuya bumolo!

Verse ya Kulonguka sambu na baleso yonso zole:

Kolosai 3:23-24b

23 Konso kisalu yina ya beno ke sala, beno fweti sala yo na ntima mosi ya mbote, bonso nde beno ke sadila kaka bantu ve, kansi ti Mfumumu Yesu mpi.

24 Sambu beno zaba nde Mfumumu Yesu ta pesa beno matabisi. . .

Longi, tula verse ya Bible na misiki ya ritime. Yimba ti kina yo ti bagestes.

Kudipesa na Kisalu, Bumolo Ve—Lesson 1

MWANA DAVIDI VANDAKA KUDIPESA NA KISALU.

Leso ya Bible: 1 Samuele 16:18-23 ; 17:17, 34-37 & 40-50 ; 2 Samuele 23:1

Kikuma ya Leso: Na nsuka ya lesa yai, bana ta bakisa kitoko ya kudipesa na kisalu, ti bo ta mona nzala ya kubika bumolo ti kusala ngolo na luzingu na bo.

Kuyantika Leso:

Sala théâtre to songa bana histoire ke songa bajeune zole. Bo ke yindula mambu ya nene ya bo yindula kusala. Na nima, yula bana:

Keti nge me yindula, sambu na inki bantu ya nkaka manisa kisalu ya nene, kansi bantu ya nkaka kusala mambu ya nene mingi ve?

Leso ya bubuyai ke songa beto raison mosi ya ngolo nde bantu ya nkaka kusala mbote, kansi ya nkaka sala mambu ya mfunu mingi ve. Inki diswaswanu na bantu yina? Yo kele na mambu mosi ya Bible ke binga “kudipesa na kisalu.” Kuwa inki Bible ke songa beto.

Na partie ya Bible ya beto ke binga “Kuwakana ya Ntama,” beto mona muntu mosi ya kudipesa na kisalu. Zina na yandi Davidi.

Malongi ya nene na leso yai:

1. Davidi kudipesaka na kisalu na kimwana na yandi bonso mvungi ya lundaka mameme ya fami.

A. Davidi kudipesaka na kulunda mameme.

Tanga: *1 Samuele 16:19, 17:15.*

*16 :19 Ebuna Saule tindaka bantu na kwenda kusonga Yese nde :
« Tinda mono mwana na nge Davidi yina ke kebaka mameme. »*

*17 :15b. . . ebuna ntangu ya nkaka yandi vandaka kwenda kukeba
mameme ya tata na yandi na Betelemi.*

Yula bana :

- Davidi kebaka mameme ya nani ?
- Davidi kebaka mameme wapi?

(Participatio ya bana):

Repeter ti ritime—Na ki-sa-lu ya fi-o-ti, ka-ka ku-di-pe-sa.

B. Yandi kudipesaka na pratike ya kusadila lanse. Beto zaba yo, sambu ntangu yandi vandaka na yo mfunu, yandi vandaka dezia ngolo na yo.

Tanga: 1 Samuel 17:49

*Yandi kotisaka diboko na kamwa-saki na yandi, yandi basisaka
kaditadi mosi, yandi tulaka yo na lanse, yandi losaka yo Goliati. Ditadi
simbaka Goliati na ilungi, yo kotaka na kati ya ntu. . .*

(Participatio ya bana):

Bana sala bageste bonso bo ke sala pratike ti lanse.

C. Davidi kudipesaka na kuyindula bankunga ya mpa ya bisambu, mpi kubula misiki.

Tanga: *1 Samuele 16:14-23.*

*14 Mpeve ya Nzambi katukaka na Saule, ebuna mpeve ya mbi . . .
kwisaka kuyangisa yandi.*

15 Bantu na yandi ya kisalu kwisaka kutubila yandi nde: . . .

16 . . . kana nge zola, pesa beto nzila beto sosila nge muntu ya kubula

miziki; kana mpeve ya mbi kusimba nge muntu yina fweti bula miziki, mpidina ntima na nge kulembama.”

17 Saule tubaka nde: “Mambu ve, beno kwenda kusosila mono muntu mosi kuzaba kubula miziki mbote, beno kwisa ti yandi.”

18 Muntu na yandi mosi tubaka nde: “Mono zaba mwana-bakala mosi, mwana ya Yesse na bwala Betelemi, yandi zaba kubula miziki mbote. . .

Yula bana:

- Keti muntu ke zaba kubula miziki kaka mbala mosi?
- Inki mutindu muntu ke longuka kubula miziki?
- Bo yindulaka nde misiki ya Davidi lenda sala inki mambu ya mbote sambu na Mfumu Saule?

(Participatio ya bana):

Bana sala bageste bonso bo ke bula misiki ya mutindu na mutindu.

D. Davidi vandaka na kudipesa na bisalu ya fioti bo pesaka yandi sambu na kusadisa bo.

Tanga: *1 Samuele 16:21, 17:17-18.*

16:21 Davidi kwisaka na nzo ya Saule, yandi yantikaka kusadila yandi. Saule zolaka yandi mingi; yandi tulaka yandi na kunatilaka yandi binwaninu na yandi.

17:17 Kilumbu mosi Yese tubaka na Davidi nde: “Baka saki yai ya ble ya kukalanga ti mampa yai kumi, kwenda nswalu nge natila bampangi na nge kuna na kisika ya bo me tunga camp.

18 Natila mpi mfumu na bo bafromaze yai kumi. Nge tala kana bampangi na nge kele mbote; nge fweti kwisa kunatila mono kima yina ke songa nde nge me bika bo mbote.

Yula bana:

- Davidi kumaka bonso sielo na nzo ya nani? (Saule vandaka Mfumu, Ntotila ya Israele.)
- Kisalu na yandi inki na nzo yina?
- Yese vandaka tata ya Davidi. Inki kisalu yandi pesaka Davidi?
- Yina vandaka kisalu ya lukumu?

(Participatio ya bana):

Bana repeter na rithme:

Mono ta sadisa. Mono ta kudipesa.

2. Nzambi sadisaka Davidi kusadila yonso ya yandi longukaka ti yonso ya yandi salaka pratike.

A. Davidi sadilaka lanse na yandi sambu na kufwa bambisi zola ya nene, ya makasi, urs ti nkoi.

Tanga : *1 Samuele 17:34-36.*

34 Davidi nde, « Mfumu, mono ke kebaka mameme ya tata na mono. Konso ntangu kana ntambu to mbisi ya nkaka ya makasi kwisa kusimba mwana-dimeme,

35 mono fweti landa yo, mono simba yo, mono botula mwana-dimeme. Kana ntambu kubalukila mono, mono simba yo na mandefo, mono bula-bula yo tii kuna yo fwa.

36 Mono me fwaka bantambu ti bambisi ya nkaka ya makasi. . .

Yula bana:

- Na inki kisalu Davidi monaka bambisi ya makasi bonso ntambu?
- Keti muntu ta meka kufwa mbisi ya makasi kana yandi me sadila lanse ntete ve?
- Keti Davidi nungaka kufwa bambisi yina ya makasi ?

Participatio ya bana :

Bana sala bageste bonso bo ke sala pratike ti lanse.

B. Davidi sadilaka lanse na yandi sambu na kufwa muntu ya nitu nene Goliati ya vandaka kupesa boma.

Tanga: *1 Samuel 17:40-49*

40 . . . Ebuna yandi bakaka lanse na yandi na maboko, yandi kwendaka kukutana ti Goliati.

42 Ntangu Goliati kumaka penepene, yandi talaka Davidi ; yandi monaka nde yandi keke leki mpenza, mbwaki ti kitoko na ilungi. Yandi yantikaka kufinga yandi

43 nde : « Nge yai ke kwisa ti nti na kunwana ti mono, keti nge ke mona mono mbwa ? » Ebuna yandi singaka Davidi na zina ya banzambi na yandi.

44Yandi tubaka diaka na Davidi nde: “Kwisa awa, nitu na nge mono ke pesa yo na bandeke ti bambisi bo dia!”

45 Davidi tubaka nde: “Nge ke kwisa na mono ti mbele, ti dikonga ya nene ti ya fioti, kansi mono, mono ke kwisa na zina ya Mfumu Nzambi, Nzambi-Mpungu, Nzambi ya basoda ya Israele, ya nge me finga.

49 Yandi kotisaka diboko na kamwa-saki na yandi, yandi basikaka kaditadi mosi, yandi tulaka yo na lanse, yandi losaka yo na Goliati.

Ditadi simbaka Goliati na ilungi, yo kotaka na kati ya ntu, ebuna yandi bwaka ilungi na ntoto.

Yula bana:

(Participatio ya bana):

Bana yonso lenda repeter bandinga ya Davidi na Goliati, phrase yai.
“Kilumbu yai/ Nzambi pesa nge na diboko na mono!” 1 Samuele 17:46a.

C. Davidi bulaka misiki, ti yo nataka ngemba na Mfumu Saule.

Tanga: (1 Samuele 16:14-23). Tala baverse diaka na luyantiku ya page 3.

Yula bana :

- Inki mutindu Davidi salaka misiki na yandi ?
- Yo sadisaka nani ?

(Participatio ya bana):

Mwana mosi kwisa na ntwala ya classe kusala théâtre bonso yandi kele Mfumu Saule. Mwana yina ta tala bana ya nkaka na luse mosi ya makasi. Bana ya nkaka yimba ti sala bonso bo ke bula misiki. Ntangu bo bula misiki, Mfumu Saule yantika kumona ngemba, ti makasi na yandi yantika kumana.

Davidi sonikaka mingi ya Bankunga ya kele na mukanda ya Bankunga na Bible na beto. Tii bubuyai, beto kele kutanga ti kuyindula bankunga ya yandi sonikaka. Bantu bingaka Davidi, “muntu yidikaka bankunga ya kitoko sambu na bantu ya Israele” (2 Samuele 23:1).

(Participatio ya bana diaka):

Keti bana yonso ya classe zaba Bankunga kapu 23 ? Kana mpidina, bo lenda tuba yo, bo yonso na kimvuka. To, kana ata mwana mosi zaba yo, yandi lenda sala yo repetition. Songa bana nde, tala, tii bubuyai, beto yonso ke bambuka, ti beto ke yindula bankunga ya Davidi sonikaka. Bankunga yai, bubuyai beto ke tubaka yo, kansi Davidi vandaka kuyimba yo. Yo ke sadisa beto ti yo ke pesaka ngemba na ntima tii bubuyai.

Kumanisa Leso: Davidi kudipesaka na kisalu na kimwana, ebuna Nzambi kangulaka yandi bampila ya kuluta nene na kusadila Yandi.

- A. Yandi sonikaka mukanda ya Bankunga na Bible na beto, ti yo kele kusadisa bantu tii bubuyai, bamvula 3,000 na nima yandi me fwa.**
- B. Davidi kudipesaka na kisalu, ebuna Nzambi pesaka yandi zina ya bantu bambuka ti zitisa tii bubuyai.**

(Participatio ya bana):

Yula bana kana bo banza nde bantu ta bambuka bo to kisalu na bo bamvula 3,000 na nima bo me fwa.

C. Davidi kudipesa na bisalu ya monikaka bonso fioti, ebuna lumbu mosi Nzambi kumisaka yandi Mfumu, Ntotila ya Israele.

Kumanisa histoire:

Kieleka, Davidi vandaka kaka na kudipesa na bisalu ya bantu pesaka yandi konso lumbu, ebuna Nzambi sadilaka kudipesa na yandi sambu na kuyidika yandi to kupreparer yandi kusala mambu ya nene ya kele kusakumuna bantu tii bubuyai.

Devoir sambu na bana ya zaba Yesu dezia:

Inki Nzambi me pesa nge kusala bubuyai? Keti nge ta zenga nde banda ntangu yai, nge ta kudipesa na yo, sambu nge zaba nde kisalu yina kele kuyidika nge to ke preparer nge sambu nge vanda na mpila kusala bisalu ya kuluta na ntangu ke kwisa?

Kubinga bantu na Yesu:

Kudipesa na kisalu ta sadisa nge mingi na luzingu na nge, kansi yo ta nata nge na zulu ve. Yo ta gulusa nge ve. Yo ta katula masumu na nge mpi ve. Kaka Yesu Kristo lenda sala mambu yina. Keti nge me ndima Yandi? Keti nge me yamba Yandi na ntima ti na luzingu na nge? Kana nge me yamba Yandi ntete ve, kansi bubuyai nge zola kundima Yandi, nge lenda samba ntangu yai, ti lomba Yandi kugulusa nge. Nge lenda songa Yandi nde nge kwikila Yandi. Na nima, kana nge me sala yo, keti nge ta sonikila mono note ya fioti kutuba nde, "Mono yambaka Yesu." Yo ta pesa mono kiese, ti mono ta sambila nge Nzambi.

====

Nsuka ya Leso 1

====

KUDIPESA NA KISALU, LESO 2 MWANA YESU VANDAKA KUDIPESA NA KISALU

NB: Sadila disongidila ya « kudipesa na kisalu », verse ya kulonguka, ti bankunga kiteso mosi bonso Leso 1.

Leso ya Bible: Marko 6:3, Luka 2:41-52, 3:31-35, Matayo 4:18, 4:23-25, 5:1, 8:1, Yoane 5:39, 19:30

Kikuma ya Leso: Leso yai ta sadisa bana kumona yo kuluta mfunu ti kuluta kitoko nde bo kudipesa na kisalu. Ebuna bo ta bika bumolo ti bo ta tula ngolo na kudipesa na kisalu na luzingu na bo—na fami, na classe, na kisalu, ti na luzingu yonso.

Kuyantika Leso:

Nani lenda bambuka disongidila ya phrase yai, “kudipesa na kisalu?” (Ee, yo zola kutuba nde muntu sala ngolo ti sala konso lumbu na kusala yina ya Nzambi me pesa nge kusala.) Keti nge me meka kusala mpidina na mposi me luta? (*Longi, bika ndambu ya bana pesa mvutu ya nkufi, kusonga inki bo me sala to inki bo me meka kusala. Pesa bo kikesa sambu na mpila bo me meka.*)

Nge banza nde nani kele mbandu ya kuluta mbote na Bible ya mvimba ya muntu ya vandaka na kudipesa na kisalu? Bantu ya mbandu ya mbote na mambu yina kele mingi, kansi Yesu kele mbandu kuluta bo yonso. Bonso Yandi vandaka na masumu to na kifu ve ata mosi, yandi kele mbandu ya kuluta mbote na mambu yonso. Inki mutindu Yesu songaka mambu yai ya kudipesa na kisalu na luzingu na Yandi? Beto tala inki Bible ke tuba.

Malongi ya Nene ya Leso Yai:

1. Mwana Yesu vandaka na kudipesa sambu na kulonguka Bible.

Yo yina, ntangu Yandi me lungisa bamvula kumi na zole, dezia Yandi vandaka capable na kusolula ti balongi ya nene ya Bible, ti kuyula bo bangyifula.

Tanga: *Luka 2:46-47*

46 . . . bo monaka yandi na Nzo-Nzambi, yandi me vanda na kati ya balongi ya bayuda. Yandi vandaka kuwa bo, yandi vandaka kupesa bo bangyifula.

47 Bantu yina yonso vandaka kuwa yandi, bo vandaka kuyituka sambu na mayele na yandi ti sambu na bamvutu yina ya yandi vandaka kupesa.

Yula bana:

- Mwana Yesu vandaka wapi?
- Yandi vandaka kusolula ti nani?

- Bantu ya waka, bo vandaka kuyituka inki?

(Participatio ya bana):

Lomba bana ya classe kukangula baBible na bo ti kutanga konso sika na kati na yo. Bo landa na kusala mpidina ntangu yonso diboko na nge kele na zulu. Ntangu nge tula yo na nsi, bo bika kutanga, ti bo vanda pima.

**2. Mwana Yesu vandaka na kudipesa na luzingu ya fami (Luka 2:51).
Yandi vandaka kulemfuka na bibuti na Yandi, Maria ti Yosefi.**

Tanga: *Luka 2 :51b Yandi vandaka kulemfuka na bo (bibuti na Yandi).*

Yula bana:

- Ata Yesu vandaka Nzambi kibeni, bonso mwana Yandi vandaka inki mutindu ti mama ti tata ya sansaka yandi?
- Keti nge zaba mwana ya nkaka ya lemfukaka konso ntangu?

(Participatio ya bana):

Bika ndambu ya bana ya classe songa inki mutindu Yesu zolaka kuvutula: 1. Kana Maria lombaka Yandi kusadisa kulamba madia, 2. Kana Yosefi pesaka Yesu ti baleki na Yandi kisalu ya kukomba sika yandi salaka bima ya mabaya, 3. Kana Yosefi bingaka Yesu, kukwisa kudia.

**3. Mwana Yesu vandaka kudipesa na kisalu ya sharpantie. (Marko 6:3)
Yandi longukaka kisalu yina na diboko ya Yosefi.**

Tanga: *Marko 6:3*

(Bantu ke yulana bo na bo sambu na Yesu :) Keti yandi kele sharpantie ve ? Keti yandi kele mwana ya Maria ve, mpi mbuta ya Yakobo ti Yosesi ti Yude ti Simoni ve? Bampangi na yandi ya bankento, keti bo kele awa na kati na beto ve?" . . .

(Participatio ya bana):

Bana yonso sala bageste bonso bo ke sadila outils ya maboko sambu na kusala bima ya mabaya.

**4. Yesu vandaka kudipesa konso ntangu na ministère na Yandi ti bantu.
Yandi sadilaka ntangu ya Yandi vandaka kutambula (Matayo 4:18-19), ntangu Yandi monaka bantu mingi (Matayo 5:1-2), ti ntangu ya bantu vandaka kulanda Yandi (Matayo 8:1). Yandi vandaka kubinga bantu, kulonga, ti kubelula bantu.**

Tanga : *Matayo 4 :18-19a*

Ntangu Yesu vandaka kuluta na lweka ya dizanga ya Galilea, yandi monaka

bampangi zole, Simon. . .ti Andre. . . Yesu tubilaka bo nde, “Beno kwisa landa mono.”

Matayo 5:1-2: Ntangu Yesu monaka bantu mingi-mingi, yandi kwendaka kuvanda na zulu ya mwa-ngunga mosi. Balonguki na yanddi kwisaka penepene na yandi, ebuna yandi yantikaka kulonga bo. . .

Matayo 8:1: Ntangu Yesu kulumukaka na ngumba, bantu mingi landaka yandi.

Yula bana:

- Keti Yesu landaka kisalu na yandi kaka heure mosi konso mposo, to yandi landaka yo konso ntangu, konso sika yandi vandaka na ntangu yina?
- Inki ke songa nge nde Yesu vandaka na kudipesa na kisalu na yandi ?

(Participatio ya bana):

Repetitio ritimike: Yesu sa-LA-ka NGO-lo. Ku-LON-ga, Ku-be-LU-la, Ku-SON-ga lu-ZO-lo na BAN-tu YO-nso. (Repeter.)

- 5. Yesu vandaka kudipesa kumanisa yonso ya Tata pesaka Yandi kusala, tii ntangu ya Yandi kufwaka na zulu ya kulunsi, tii ntangu Yandi telemaka na lufwa.**

Tanga: *Yoane 4:34*

Yesu tubilaka bo nde: “Madia na mono kele yo yai: na kulanda luzolo ya muntu yina tindaka mono ti na kumanisa kisalu yina ya yandi me pesaka mono na kusala.

Yoane 17:4

Mono me songaka lukumu na nge awa na nsi-ntoto; mono me manisa kisalu ya nge me pesaka mono na kusala.

(Participatio ya bana):

Repetition rithmik: Ye-su MA-ni-sa-ka ki-SA-lu YO-NSO, tiiii na LU-fwa!

Kumanisa Leso ya Bible:

Kana Yesu vandaka ve kudipesa sambu na kumanisa kisalu yonso ya Tata Nzambi pesaka Yandi, beto zolaka kuvanda na mpila ve kubaka ndolula ya masumu. Beto tonda Nzambi nde Yesu vandaka na kudipesa na kisalu ya Tata Nzambi pesaka Yandi!

Muntu ya me sonika leso yai Mama Lorella Rouster, MCE.....

Devoir sambu na bana ya zaba Yesu dezia:

Mbala ya nkaka, ata nge ikele mukristo, nge me vanda ndambu bumolo. Mbala ya nkaka nge me sala ve na mpila ya kudipesa na bisalu ya Nzambi me pesa nge. Yai kele masumu. Yo kele kuzitisa Nzambi ve. Yo ke songa ve kinene ya Nzambi.

Kansi, kana nge me mona ntantu sambu na bumolo na nge, kana nge zola kuyantika kusala na mpila ya nkaka, Nzambi kele na ntima kulolula nge. Kana nge kele na mfunu ya lusadisu ya Nzambi sambu nge kudipesa na kisalu kuluta, kaka lombamba lusadisu na Yandi. Yandi zola sadisa bantu yonso ya sosa Yandi. Beto yonso bakristo, beto tula ngolo kubika bumolo. Beto tula ngolo kudipesa na kisalu, sambu na kupesa Nzambi lukumu.

(Longi, pesa konso mwana kitini ya papier. Lomba bo kusonika bampila mosi to zole ya bo zola kubika bumolo, kuyantika kudipesa na kisalu. Bo simba papier yina na diboko, ebuna nge samba Nzambi nde Yandi sadisa bo kubika bumolo.)

Kubinga bana ya zaba Yesu ntete ve:

Mbala ya nkaka nge zaba ve kana nge kele mukristo ya kieleka. Mbala ya nkaka nge me yamba Yesu ntete ve bonso Mvulusi na nge. Zaba nde, sambu Yesu kudipesaka kumanisa kisalu ya Tata Nzambi pesaka Yandi, tii kumanisa kisalu kufuta lufutu yonso ya masumu na beto, ebuna beto lenda guluka. Beto fweti sala ata kima ve, kansi kaka tula ntima na kisalu yina ya Yesu salaka sambu na beto.

Kana ntima na nge me yikama kuyamba Yesu, kaka samba ntangu yai. Songa Yandi nde nge ke ndima Yandi. Lomba Yandi kulolula masumu na nge. Songa Yandi nde, ee, nge kwikila Yandi. Yesu ta kota luzingu na nge. Yandi ta kitula nge muntu mosi ya mpa. Yandi ta kitula nge mukristo.

Na nima, keti nge ta sonikila mono mukanda ya fioti? Kaka sonika bandinga tatu yai: “Mono yambaka Yesu”, ti zina na nge. Nge lenda pesa mono lettre yina sambu mono bambuka nge na lombilu.

===

NSUKA YA BALESO YONSO 2

===